

摘藻堂四庫全書薈要

集部

欽定四庫全書薈要

集部

雞肋集卷十五

二至

詳校官助教臣謝登雋



欽定四庫全書薈要卷一萬五千二百七十九

集部

雞肋集卷十二

宋晁補之撰

詩

送張緡子望太常簿

張侯於我丈人行十年江湖心鄉往平生獨立白雪曲
少時妙譽青雲上胡為四十尚飄蓬逢衣騎馬鄴城中
將軍寶帳簪履肅開府畫筵簫鼓雄況復儒宮飽閒暇

堂有叢書竹瀟灑論文不厭夜經過起看北斗插黃河
相逢安得怨寂寞仲宣樓頭良可樂何當奇計出番禺
未應長檄開印符太常句稽亦不冗少卿淑問清時重
俎豆之事則嘗聞男兒讀書業有用歸去天邊道路長
東風春草滿池塘美人不來時晚晚誰與玩此林間芳
鄭彥能求擬江亭詩

亭下流泉三畝隘誰擬西江晴一派桃李佳名聞昔人
此言雖小可喻大寧非逐楚顙顙身當是羊裘傲漢人

避世牆東王君公五經紛綸并大春端然養魚廢車馬
一身環堵觀天下吾人鄭子詩句新高堂素壁開瀟灑
何當湛湛見青楓白蘋落日慰相逢一亭兩檻更何有
波濤風雨舩前後莫憶桑槎犯漢津莫憶樓舩下石城
盡醉漁陽無好曲短蓑銅斗平生足

贈楊景平

君不見華陰楊君漢孔子君生其後無乃似平居恐懼
西北隅力行發憤尚不媿君今鳴櫓下長淮眼明清曉

三楚開揚州行矣勿濡滯江南細雨收黃梅我今正是
鳥折翼肺病三年廣文直昔時黃帽榜舟人却向西湖
當不識寄聲關子老漁樵小山桂樹不須招棄槎東海
未敢必欲去天台觀石橋

送吳黯赴闕

我初官此君未來君今去此我未往翻飛豈不慕緬邈
留滯何能悲執掌學道平生昧蹊徑半世端如走榛莽
古人曾病田甫田切磋安可去吾黨東風消雪送鴻雁

南國連山生篠簜為當歸夢五湖中會有高名百寮上
送陳逸之筠州

居貧百草春霍靡製作舞雩春服美愛君欲贈華韡韡
思君何處無芳卉三年眼花祇欲眠驚夢往往音楚然
單金安所用吾技術成正復遷劉累不狩何由有貍特
錢鏐須勤晚方積呻吟裘氏日已多恩流三族功比河
告行風雨春物空催花作果黍芄芃亦從梁汴即清潁
湛湛已見江頭楓嚴君被命分符虎昔者無襦今五袴

未勞負米迂山川姑弟酒中從聖賢

一作奉甘未用君力田君弟酒中從

賢聖

過劉季孫

劉侯歲覆春堤料居不曾閒須我勞未嫌清濁各有攜
匪報瓊瑤以為好吏訶單絞自可更兒笑接羅從復倒
為憐徒步此青袍重憶歸來著黃帽官忙未向林野疎
時清不廢詩書傲梨花如雪許重尋秋實垂牆晚方到

贈段萬頃

美人窈窕家南國可與副笄親黍稷平生寂莫鳳將雛
慙愧木桃猶報璧石城三槩為誰催萬里清江凌不測
王門酒肉傲勝詭豈有鄒陽仍下客危詞欲洗大夫冤
千載獨懷吾祖賢不量腹小文籍博頗似井蜺輕飲川
丈夫趣舍無南北情親非為牆屋連子真正用卧谷口
乃有高名諠日邊胸中傀磊契何所自笑柴愚得參魯
借令好問忘足爾狐腋豈堪黃犬補吾身櫟社真寄耳
趣取無用安足數無心俎几羶盤辱拳曲不羞人厭覩

土山出火石為融義和當午車隆隆通渠束帶過者寡
乃獨葛巾終日同傾困倒廩用餉我我為牙羽陳編鍾
蟬聲入耳廩節改別我整驂無愧容

次韻魯直謝李右丞送茶

都城米貴斗論壁長饑茗椀無從識道和何暇索檳榔
慙媿雲龍羞肉食壑源萬畝不作欄上春伐鼓驚山顏
題封進御官有局夜行初不更驛宿冰融太液俱未知
寒食新苞隨賜燭建安一水去兩水易較豈如涇與渭

右丞分送天上餘我試比方良有似月團清潤珍藜羊
葵花瑣細胃與腸可憐賦罷羣玉晚寧憶睡餘雙井香
大勝膠西蘇太守茶湯不美誇薄酒

與李文叔夜談

中庭老柏霜雪裏北風烈烈偏激耳誦詩夜半舌入喉
飲我樽中淥醺美升堂辭翰愧非有何異還家數其齒
文章萬古猶一魚乙丙誰能辨腸尾更慙頗似會稽康
欲語常遭士瑤杞廣陵八月未足言曾使醒醲恣然起

安得譚如子枚子

贈送張愈秀才

秋水幽幽濟河道君挂蒲帆若飛鳥西風黃葉滯公車
雞黍從君懷故廬男兒自有四方志世上相期獨榮利
昔時馬周徒步動天子君今有用當如此

魯直復以詩送茶云願君飲此勿飲酒次韻

相茶真似石韞壁至精邨可皮膚識溪芽不給萬口須
往往山毛俱入食雲龍正用餉近班乞與麋官誠覲顏

崇朝一盃坐官局申旦形清不成宿平生落此臭味同
故人貽我情相燭黃侯發軔日千里天育收駒自汧渭
車聲出鼎細九盤如此佳句誰能似遣試齊民蟹眼湯
扶起醉頭湔腐腸頗類它時玉川子破鼻竹林風送香
吾儕幽事動不朽但讀離騷可無酒

次韻蘇公翰林贈同職鄧溫伯懷舊作

雪堂蜜酒花作醅教蜂使釀花自我堂前雪落蜂正蟄
恨蜂不采西山梅漫浪飲處空有跡無酒可沃胸崔嵬

不知幾喚樊口渡五見新厯頒清臺鄧公昔歎不可挽
素衣未化京雒埃山中相邀阻筇杖天上對直同金罍
只今江邊春更好漁蓑不曬懸牆隈百年變化誰得料
劍光自出豐城苔老儒經濟國勢定近臣獻納天顏開
蜀公亭上別公處花柳未逐東風摧尚容登堂譚落屑
不媿索米腸鳴雷因知流落本天命何必挽引須時來
九關沈沈虎豹靜無復極目江楓哀

次韻文潛館中作

蓬山前臨九軌路三日街晴案吹土直廬鑿牖面宮垣
青壁嶄嶄看垂雨殿閣風斜碧瓦寒翅濕蒼鳶不能乳
却思窮巷亦可言一埽蚊虻通昔苦鬱蒸書課未須忙
午漏傳休聽天語傳宣暑伏午
後罷校讐平生豪氣對樽酒山雞
見鏡猶能舞城南寺近晚堪過笙歌涼月聞千戶但憂
伏日細君須割肉無緣待歸俎

次韻太學黃博士冕仲同考試作

日邊傳詔天街莫草草西城車馬聚官曹一見故情親

宴語識君心志古成安長孺澶淵守昔君羈游所為主

我窮亦號成安客文采初無君一縷

予與晁仲俱為韓澶州璫之客

胸

中萬頃復誰同正有君家賢叔度官事留人何鞅掌廣
文楊柳花飛戶好書老未置鉛槧學經晚始羞章句藥
槎況自風格有病顰那可形容慕成詩莫憚繼日傳青
驄御史呼歸去

復用前韻贈祠部陳元興

行樂曾聞戒遲莫人生波上飛鳬聚蘭亭往事如過雨

山陰脩竹空千古陳侯揮翰少年時三賦聲名動人主
可是高才棄繩矩自然采繡非針縷五十天南把一麾
猶得無襦歌叔度邂逅西城築治墟王官繼日車連戶
自言春晚洞庭歸日落江南得佳句傾蓋何妨許如故
執鞭況是平生慕但憂筆陳困攻堅儻許尋盟解圍去
復用前韻呈刑部杜丈君章

杜侯灑墨春雲暮紛紛滿紙棲鴟聚文章不犯世故鋒
牛鬼荒虛瓦棺古平生傀儡石寧獨此躋俗唐虞要遭主

先君諸父盡金蘭申以婚姻况覩縷勞心吏卷官有程
得意羽尊美無度尚憶花妍春仲時休沐黃昏來叩戶
苦憐蟾桂將十分欲贈海棠無一句巷南巷北相遇稀
而此從公慰懷慕安石榴紅儻可期公不來過我當去
二花兩家皆有且素約矣

復用前韻再呈博士黃冕仲

龍津之北雙溪驚逶迤勢入龍津聚龍歸何處牛斗閒
劒不可求江海古慘澹猶思八百年變化豈無神物主

何當旋施入齋淪僮可然犀照毛縷登樓那有北客同
把酒但看南雁度更邀桃葉遠臨水正值荔枝紅照戶
入梁一曳鄒陽裾思越屢吟莊舄句竹林觴詠當日情
峴山名姓它時慕一聞說盡青鞵游令我乘風欲仙去
送龍圖范文德孺帥慶

君不見先君往在康定中奉詔經略河西戎大順胡蘆
盡耕稼賊書不到秦關東邊人咸識侍中子至今猶說
將軍似給事文武龍圖賢大馮小馮安足言韶年書傳

有肝膽二十起家車檻檻蛟龍雲雨時可用麒麟圖畫
功非晚况聞馳傳厭山谷頃時河隴嚴飛輓朝廷屬休
蘭會兵秦人倚慶為長城時平斥堠正須遠軍閒留田
未宜輕東風浩浩吹榆柳相勸西城古原酒班春曷不
問遺老先公遠謀尚多有女郎山下萬貔貅部曲肥馬
身輕裘此曹賞賜飽無用談話豈得希封侯趙邊今日
須李牧士無超距姑食肉

初與文潛入館魯直貽詩并茶硯次韻

黃侯閱世如傳郵自言何預風馬牛草經不下天祿閣
詩入雞林海上州兼陳九鼎燦玉鉉並綴五冕森珠旒
後來傀磊有張子姓名並向紫府收青春一篇更奇麗
勢到屈宋何秋秋洮州石貴雙趙壁漢水鴨頭如此色
贈酬不鄙亦及我刻畫無鹽譽傾國月團聊試金井漪
排遣滯思無立錐乘風良自興不淺愁報孟侯無好詩
用文潛館中韻贈蔡學正天啓

蔡侯飽學困千金濯足清江起南土立談頗似燕客豪

快奪范睢如墜雨東城禽羽未足言柏直何為口方乳
蔣侯山中伴香火三年不厭長齋苦平生傀落有誰同
要得張侯三日語晝閒那自運甕忙時清不用聞雞舞
桓榮歡喜見車馬書冊辛勤立門戶自當食肉似班超
猛虎何嘗窺案俎

次韻魯直試院贈奉議李伯時畫詩

東房攜卷繞幕行西房卷作墮地聲紙山間出筆陣橫
李侯畫若禪眼透觀魚玄沙骨竦瘦舟中淵明細若豆

歸心抵愛玉花驄不須棘針學癡翁惱渠愁作眉鬬紅
數物伯時
試院所作

喜文潛自淮南歸招飲西岡呈坐客

春回三楚冰生漪銀臺春夢歸心馳莫言上水百丈苦
淮渚東風一月期都城經春雪蔽地百花不放須君至
清晨一紙國門書走馬蓬壺下直初保康橋頭燈照夜
我馬鳴嘶向君馬得君豈但官局同卜鄰况近南城下
文詞翊善知名久丈人令德于公後同年廖李芸省郎

吳門隱尉身姓張平時花發值此客隨分東牆有春色
宮壺賜酒玉流卮請君但作留春詩人生身外安所知
為君借舞杜廷尉對花有酒那不醉

李成季得閻子常古琴作

昔人流水高山手此意寧從絃上有閻侯卷舌臥閻里
意向是中留不朽似聞綠綺置床頭暑雨東城無麥秋
趙傳和氏齋五日吳得湛盧當兩州李侯得意誇題柱
成詩欲使邀諸路自有桓山石室彈深屋時聞繭抽緒

無琴尚可何獨絃要識精微非度數人生有累無非失
我欲心灰木為質嬾從微的自凝塵老向詩書逾愛日
自言結習久難除猶理斷編尋止息焦城卜築近連軫
歸約閭侯亦蕭瑟舊聞君祖課木奴試買瑕丘百株栗

雞肋集卷十二

欽定四庫全書薈要卷一萬五千二百八十

集部

雞肋集卷十三

宋 晁補之 撰

古詩

同魯直文潛飲刑部杜君章家次封丘杜觀仲韻
廷尉風流才絕塵最憐高髻歌陽春兩鬟亦解倚瑟語
催送花前紅袖舞黃張翰墨海內名席上生風清夏宇
封丘自倚筆勢豪不怕當筵賦鸚鵡對酒含情古所憐

樂事幾時如過雨
阮公鑪邊不擬歸
陸郎班駘無用嘶
長燈照出簾幙外
缺月墮落藩牆西
斗酒雙魚何足貴
李侯氣許山東吏
正須新麵雜青槐
千里紫萸江上來
長舫刻玉流霞動
快引不須帆櫓送
自作新詞碧牡丹
箸擊盃翻釵墜鳳
芍藥佳名聞昔人
滿插不辭歸帽重
倒床任作鼻鳴雷
屋上啼烏還喚夢

次韻校書孔彥常校資治通鑑作

羣公愛我邀我居
平生文舉情豈疎
鈎陳玄武在北極

上帝之府森圖書趙韓魏降顯德尾司馬蟬媽世良史
其人不見其言在青草生原歲陽止吾君好學由生知
成湯得尹方有為應合它年尹躬學書成泣像麒麟閣
次韻蘇翰林廐馬好頭赤

君不見崑崙龍種非凡肉不但蹄高耳批竹區區吳蜀
有二駿跳過斷橋飛出谷萬蹄縱牧原野赤汧隴收駒
日復日未須天廐驚好頭冀北未空聊一歷

送劉景文兩浙西路都監

余舊與劉
同官北門

劉侯八尺力如虎遣守黃河千里堤閉門寒郊似深隱
蟲響秋巷牆懸梨我官北門四換歲訪飲屢過城濠西
雁飛不到建章闕欲往何異車無輓詩篇驚人衆側耳
蚤有高譽無卑栖詔綏兵馬吳八郡畫船下汴光生蛻
西湖靈隱天下冠幽人釋子多招提松林竹塢我行地
拂拭定有塵埃題山堂清酒小泥赤吳歌白紵雙蛾低
少年放意入雲水只今塊坐愁冠筭君行日夜向佳景
洞庭霜落羞鰕鮓莫誇能飮便鞍馬閩琛海賁通蠻谿

時平游宦行樂耳屬有佳客須頻攜明年我亦丐一邑
扁舟江上隨鳬鷺

送直閣杜君章守齊

杜公文史不讀律平反世稱徐有功官為列卿位亦顯
臯陶事與禮樂同書生翫陂笑法令弦歌不媿陵陂中
衆賢和豫治乃舉但願主聖朝廷公白頭典校漢天祿
未煩載酒如揚雄自言臣老應報國五馬便去如飛鴻
京東耳聞事可數似說振貸倉儲空裕民誠患力不足

措國豈與民俱窮才難所要遇事了仁厚未免無能蒙
囊中食玉百未試干越在匣光生虹却嗟鉛槧坐棄日
伊我何補羞兒童力能如虎安敢爾鬢毛幸未成老翁
亦思一郡効尺寸官卑未計伸喉嚨飽知世事祗坐嘯
又看馬鬣吹西風平生放意在雲水落身塵土禽閉籠
經時無酒對佳客偕與歌舞開心胸公行媯曼載雙舸
誰與客勸琉璃鍾

次韻文潛瞻啓聖院旃檀像

至人如幻千億身若以色觀皆世人大千初自一漚發
變化誰能知本因移天宮殿著人世斷取無異陶家輪
當年紫磨已殊勝後來浮海亦有神緬懷此地初啟聖
真人繼出天下春莊嚴事祕理莫測萬世鎮守無陳新
寶坊千柱衆八百衣食隨念何由貧天寒急景過駒隙
坐穩不去同鷗蹲歸來想像發光影一洗百慮無餘塵

送外舅杜侍御使陝西自徐州移作

建隆以來論人物得士與古相低昂人才歷數仁祖世

後生嵬瑣無復望老成寂寞典刑在杜公玉立映班行
少時學問聖賢說松柏歲寒觀老節得官烏府不須臾
正色空聞動帷闥金衆口未必然天與名城慰蕭屑
王師頃縛山西酋朝廷却懷西顧憂涼州旄鉞何足恃
岐隴須公勤傳郵平生經國有雅意乘流得坎惟所值
作官施設要近民金馬嚴徐等兒戲詔書寬大人樂生
吏安為弛威不行金城那可無粟守堯舜與民寧並耕
茶鹽資國何必古俗儒徇名不知務精神折衝在本彊

要以雍容在蒼遽知無不為公自期豈弟君子神所私
秦山渭水照車馬屬城列縣觀威儀此行屬任良不惡
金魚新佩明光墀誰言直諫居內少淮南盜鑄煩撫綏
時平王度日金玉歲晚汲公還見思

次韻文潛憶楊翰林元素家淮上夜飲作

老人得坐安若山畏寒縮頸衣裘間不如公子擁樽酒
詩材春亂詞濤翻想見楊家美人出玉面朱脣映琴瑟
冰船著炬光照淮雪亂風筵飲方逸只今愁坐私自憐

寒書凍硯塵滿前人生何者非昨夢還如歸去散花天
老人已復形槁木真幻那知然不然蚓鳴小鼎藜羹熟
閉眼圓蒲不是禪

贈麻田山人吳子野

余見待制李公誠之於汶上
蘇密州在焉始聞子野名

汶陽我昔見蘇李人言吳子歸未幾長嘯春風大澤西
却望麻田山萬里不逢鄭老溪上箭欲致朱公路傍米
今年窮巷絲生髮馬尾吹風化衣袷定知赤鯉薦波濤
何意黃冠驚僕妾琅函萬過陰魄悲心無丹白鑪生兒

山中種芝豈無侶成都醉眠未當去願從王烈或見呼
試訪孫登竟無語棄家內愧非此流此身天地一虛舟
未應齒豁塵埃裏乞與青精救白頭

送北京學生曹慈明秀才之京師

魏武子孫今寂寞唐來只有畫將軍鄴城初見黃須面
尚喜登堂詞若雲乃公白首圖籍裏小心恐懼教其子
文章錦心仍繡腑屠龍殫家安用許半年繫舩康海門
官忙不共持一樽岡頭梨花吹欲盡淮口汴流來正渾

鄙夫日欲向吳越官滿一封飛魏闕著書虎觀未敢言
蔽身蟬葉真癡絕

東坡先生移守廣陵以詩往迎先生以淮南旱書
中教虎頭祈雨法始走諸祠即得甘澤因為賀

去年使君道廣陵吾州空市看雙旌今年吾州歡一口
使君來為廣陵守麥如櫛髮稻立錐使君憂民如已饑
似聞維舟禱靈塔如絲氣上淮西睢隨軒膏澤人所待
風伯何知亦前戒虎頭未用沈滄江龍尾先看掛清海

為霖功業在傳巖如何白首擁彤幃世上讒夫亂紅紫
天教仁政滿東南青袍門人老州佐千世無成志消愠
封章去國人恨公醉笑從公神許我瓊花芍藥豈易逢
如淮之酒良不空一醵孤鴻煙雨曲平山堂上快哉風
至日同文潛舍人飲錢京兆穆父家

大尹孤標琢崑玉舍人骨相飛食肉弊裘羸馬愧我寒
喚飲東齋散膚粟少時獨識孔文舉不交餘子平生足
尹門如市立相躡尹心如水平可掬鄰無惡少歸醉卧

不遣長鬚訟騎屋閉門不出三日雪冷坐西軒花眩目
未妨詩句敵青春痛飲何由髮還綠

送李端叔從定州先生辟

中山老師巖廊姿不用猶作諸侯師毛錐變化有風雨
餘事亦足疲羣兒龍門爭驚貨趨肆求貨安知於此市
百年用舍我何有一語重輕人取是李君懷璞世又嗤
世人不寶公收之乃知士固伸所知黃金鑄作鍾子期
不如晏子共一時時平關鍵一臂持於何用此賓主為

鞭長未可施馬腹要以高名驚殊俗應戴接羅攜葛疆
笑談過市人隘坊勿憶平山如峴首它日我名同不朽
有年公昔但吟詩無事君今姑飲酒只憂我似蠹書魚
無復驤首鳴鹽車一麾儻許從方伯要著韎韐親丈席
登臨相與看劉公長嘯犬羊空漠北

和文潛期飲大尹穆父家兼呈尹

野人骯髒無與鄰世人共笑子獨親沛然有餘不矜飾
我亦謂子誠可人萬魚噉喁困復却看子撒捩黃金鱗

人甘如醴飲者醉我獨蜚口如薑辛淮南歸來兩鬢雪
閉門自不羞甌塵無衣可換江頭醉有誰肯載樽中醇
愧慙救渴京兆尹空缸尚可供十巡放言與子一傾倒
非子畏人嫌我真府中貴人玉比德堂下和氣天回春
醉人多忤貴人怒來呼莫憚衝泥頻

和東坡先生梅花三首

霜晴十月玉溪村見梅開早客迷魂山阿若有人含睇
跂望不到霜煙昏東西野寺通兩徑上下竹籬開一園

落身麴蘖盆盎裏晨坐對花無酒溫歸來山月照玉蕊
一盃徑卧東方暎羅浮幽夢入仙窟有屨亦滿先生門
欣然得句荔支浦妙絕不似人間言詩成莫歎形對影
尚可邀月成三樽

幽閒合出昭君村芳潔恐是三閭魂無人嶺上更儂好
不與俗花名合昏蒼官森出劍珮列甲夫密裏旗槍園
數株臨水欲仙去一笑向人如玉溫火維草木百名字
十月不冷常炎暎同心紫蒂宜上苑啄人虎豹司九門

借令驛使能遠致要比桃李終無言豈惟千里共明月
亦可千里同芳樽

梅花落盡上饒村腸斷子規啼月魂慰人獨有白玉蕊
不到牕前只醉昏坐鑪環甕不舉首浮花浪蕊空滿園
海山有客心似水揮塵自散炎洲溫松風亭下亦如夢
不見枝雪流初暎孫登一絃百韻足有山便足同蘇門
似聞對客但長嘯獨謂此花終日言一篇尚可三致志
聽人酌去如嚮樽

和王定國二首

可憐好月如好人我欲招之入牕戶人言明日當大暑
君看繁星如萬炷想君映月讀書時清似列仙臞不肥
我正甘眠愁日出朝騎一馬莫還歸

還朝便與山水疎只有此月隨吾居莫論人隔十日面
猶勝犬傳千里書清虛有物濯煩暑藤床對月如對雨
賦成鴻雁入周詩未覺宣王似吾主

次韻蘇門下寄題雪浪石

居庸滅烽惟留屯時平更覺將軍尊鈴齋看雪擁衲坐
急鼓又報邊城昏百壺高宴梨栗圃千里未盡桑麻村
天憐公老無以樂一星飛墮從天門得無遺履穀城化
恐是喫草金華魂不然荊棘霜露底兀然奇怪來無根
女媧擣鍊所遺棄奔淥尚有河漢痕豈其謀國坐不用
聊以永日寧復論跳梁不憂牧並塞綏納可使魚游盆
公歸廊廟誰得挽此石萬古當長存

次韻和趙令僉防禦春日感懷

春塍雪消龜兆坼凍柳冰蒲俱好色走馬城東眼乍驚
可憐前日非今日結交從古天地間百年誰見一人閒
王城塵土化衣袷五鼓驅車休夜闌況我崎嶇二三子
聖恩釋累從甌蠻雄豪久鍛酒量窄更懦新長詩辭慳
王孫物外有高興數攜王趙兩紅顏上書自去千牛衛
挂席欲過三神山灰餘方烈竈下響霧廓初見岩中斑
醉吟誰共可憐春江南太守舊詩人賡酬不減笙磬
秀發更為煙霞新萬卷藏書韋杜曲憶子陳詩一言足

得意鱸魚故未饜多情桃葉應相逐努力閒平盛世名
歸及春風雙鬢綠

次韻和文潛莫春即事

南歸見君百事足如何一官曾不閒寒衝雪泥暑鄣日
老面只今如纈斑憐君與我自同調久滯不食猶寒泉
功名櫟社直寄耳顏色不同誰後先黑牛白犢未渠怪
物理儻自相回旋愛君此語亦不出勝處紫芝眉宇間
飲中八人半寂寞最豪雋遂今誰班凝祥池上舊游處

海棠亦恐非昔年春波一眼詩句好兩腋尚覺風翩翩
投閒方轡政可勉何用不飲空三歎

用谷字韻答提刑毅父治河橋

兩堤馬頭高作山兩津車路深成谷截川天矯暮虹背
排浪參差動蛭足七牛蹴河猶怒目一牛力罷平往不
復借牛使河此聖時強飲不須求馬玉

次韻孔毅父種花因送海棠廳三大字求茶

東園老槐春不發舉頭只見中條雪江梅去國亦悽然

一萼聊堪映庭月未信河灘宜海棠十株立致非所望
為君大字書堂榜報我奩中越焙香

再用治橋韻奉送毅夫按部將行

降羌當有甲齊山空砦應無馬量谷莫憂斗米千錢貴
自可航河一葦足繡衣不但捕羣偷赦書蠲租亡者復
知君勞倦神亦充白髮何妨面如玉

雞肋集卷十三

欽定四庫全書薈要卷一萬五千二百八十一

集部

雞肋集卷十四

宋 晁補之 撰

古詩 七言

再用發字韵謝毅父送茶

開門覩雉不敢發
滯思霾胸須澡雪
煩君初試一槍旗
救我將隳半輪月
不應種木便甘棠
清風自是萬夫望
未須棄此蓬萊去
明日論詩齒頰香

贈常州感慈邦長老

大通門人

君不見大通方丈空無物亦不拈推并豎拂本原自性
未出喉已向頂門遭一吐感慈神駿渥注流壁上高僧
莫遣酬霹靂一聲龍破柱此中何處有裴休

及第東歸將赴調寄李成季

先輩觀濤滄海口長嘯橫槎拂牛斗野人醉著夢游天
九門歷盡驚復還嘈嘈廣樂猶盈耳出門依舊重人間
不知先輩今何往仙標玉骨天應賞千里東歸莫景清

桑麻暗地日銜城黃金宮闕初回望青草恩袍偶自榮
歸來澣濯親甘旨却歎京塵誤遊子家人飭黍慰辛勤
鄰媪壺漿佐歡喜君不見馮驩一劍星闌干短歌慷慨
不堪彈男兒得意貴頡脫功名有分勞躋攀折腰正為
五斗米得飽約君尋故山

復用前韵荅明略并呈魯直

廖君憤世談刺口人言寧食蔥三斗軒然羈鼻頤隱肩
日日醉市驅驢還我初目病視髣髴望君有異大人間

新豐兩行惜不上竹林風來虛自賞俯頭落筆千人驚
一戰取齊餘兩城田生龍甲賴東葦詭勝尾熱安知榮
盈盈府中誰憐此為君愧慙黃夫子論功欲識非戰罪
試使暗噫走楊喜君不見方朔高才良獨難割肉要令
生自彈北軍給食誰致爾羊求平替安能攀偶然捧檄
忽擲板鳥自知還雲出山

復用前韵荅魯直并呈明略

黃子人談不容口豈與常人計升斗文章屈宋中阻艱

子欲一身追使還
離騷懔懔悲草木
幽音細出芒絲間
陽春絕句自雲上
折楊何煩嗑然賞
橫經高辯一室驚
乍似遠人迷廣城
隔河相和獨許我
枯枿亦有條之榮
廖君不但西南美
誰見今人如是子
多髯府掾正可詭
蠻語叅軍寧素喜
君不見古來皆醉
餉糟難沐浴何須
仍振彈斲冰無處
用蘭拽芙蓉木末
安能攀只無相報
青玉案自有平子
愁關山

復用前韵并荅魯直明略且道見招不能往

銅斗承糟醉張口口和漁陽拍銅斗去年拋却青竹竿
女顏嬋媛呼我還我初不解世中語淡面郎久王侯間
未須頭出千人上要有廖君黃子賞竹林清風前日生
豫章冥冥雲擁城二人不來草木長帶缺陸離誰與榮
步行奪馬從此起談笑封侯誰氏子平生不識笳鼓悲
虛讀君詩適然喜君不見大賢遠抱與俗難何須酒盤
柔指鳴哀彈二人高韵已寥廓黃鵠之飛那得攀繩橋
可度見可喜家貧馬骨高三山

復用前韵荅唐公
唐公有一日紙貴傳都城之句
且訟其不知我也并呈魯直成季明略

諸公辯壯懸河口唾落紛紛珠百斗
井陘酣戰我已慳
赤幟忽立無由還
唐公斷後不容北
腹背未殊秦宛間
明光侯印懸天上下有死夫緣重賞書生懦志安
足驚
饑死索米長安城
獻君賜帛等優笑
覆醬未知傳紙榮
泮宮先生誠國士
可是同年予二子
雜吟未減聽
篔簹竹
能使窮愁發孤喜
君不見新聲欲至舊聲難
十指勞君

千萬彈平生不遇感知已過此身外誰能攀它年常侍
幸見訪不因豆落悲南山

復荅唐公并呈魯直成季明略

窮邦無以餬吾口歲歲荒山收橡斗商歌白石不勝寒
非為荊州三往還天下無人知我意得君相合一言間
三書丞相何煩上再見客卿寧用賞願聞關中季布名
何得此聲梁楚城論心四子誰許我百金一諾茲為榮
唐公才非今世士不見聖人見君子我今正似逃虛空

聞人楚然已心喜君不見玉川月蝕詩律難不獨蝦蟇
遭罵彈憑陵百怪付公等青天蜀道寧容攀它時鄒湛
名亦好常在我知因峴山

復用前韵呈明略

茅焦逆許磨虎口何似淳于飲一斗終軍稟傳驚漢關
何似富春投組還天下同心乖出處豈徒黃白馬毛間
鄙夫紛紛煩缺望負日可堪希國賞竹林居士亦何營
江花無限老江城那知橋上駟馬寵能作山間蕙帳榮

興國寺中四月尾海棠雪落生紅子呼門日午醉不應
昨夜君恩賜聞喜君不見卒然佳會高歡難幸值野王
聊一彈人生歧路易南北明發雲散何由攀知君未試
餐玉法我亦欲返焦城山

家池雨中二首

小池初鑿新得雨一部鼓吹從何來有蟾正碧亂草色
時出汨沒西南隈井榦跳梁百不少洞庭魚龍何有哉
能歌得勝莫入月涼夜與爾俱忘回

不作太白夢日邊還同樂天賦池上池上今年有荷葉
細雨游魚噉輕浪教兒讀易不應舉幽人一爻吾得尚
此池便可當長江欲榜茅齋來蕩漾

再用韵和陳伯比二首

田里馮生寧屑去湖海陳卿時肯來詩書好在家四壁
蒲柳蓊然城一隈騎上下山益踈矣儵從容出何樂哉
市橋十步即塵土晚雨蕭蕭殊未回

築臺危可瞰垌收朝來小雨猶十上雖無峻嶺有脩竹

不減山陰同放浪青門正爾堪邵平雲中何必須魏尚
小池更廣勿近牆畏與濁渠同滉漾

牆西有渠通舟

用寄成季韵呈魯直

懷英名高長史口獨以一人當北斗黃公崛起與之班
奄有斯名唐以還文章破觚賴聖世筆墨未逃蹊徑間
湖州太守諸儒長可獨進賢無上賞曾語黃公四坐驚
競吟佳句汶陽城

丁巳年余謁蘇湖州於汶上座中為余誦魯直詩

飲茶未勝

薄酒傾若人所辱伊人榮鳳兮德衰衆鳥恥陳蔡不憂

顏氏子窮吟百軸傳未已短髮頻搔為君喜君不見富
貴及時行樂難雖無趙女有秦彈夢中自古不識路月
在雲際勞梯攀何時半嶺聞清嘯相值蘇門百尺山

復用前韵遣懷呈魯直唐公成李明略

涇水為渠食萬口一石論功泥數斗嗟涇獨不似渭閒
安流赴海又西還天下梗枿盡隆棟何如櫟社不材閒
無能飽食猶天上巧智憂勞緣利賞我無懋功突厥名
橫身為國作長城又非石堡將軍勅帶刀奪取紫袍榮

世上此身愚莫比霧縠翻慙漢童子壯心雖欲彊自挽
鳧足元慳續非喜君不見西京對策濟時難羞死王嫖
馬上彈時平鳥雀須食爾鴻羽可用高難攀從今識路
窘捷徑求我莫傍終南山

復用前韵荅十五叔父任城相會見和詩任城有
李白舊游處錄於詩中

太華玉蓮甘適口我欲求之青壁斗崑崙不覩覩大宛
何異學射中涂還平生傲世予南阮臧否未容留齒間

七賢遠跡冥鴻上咸也復幸青雲賞歸來濁酒厭獨傾
疲馬却走諸任城紅桃白李晚寂莫黃菊獨暴秋陽榮
謫仙酒樓餘舊址明月年年飄桂子不見山東故小吏
斗酒雙魚誰共喜慟哭窮涂自古難不應更待雍門彈
瓜田今歲初自墾柴車後日復誰攀東阿下望有歸意
且為子建留魚山

聞文潛舍人出試院約毅父考功尋春

上界官府多文書我臞猶比山澤儒閒忙態異匹羊等

一月不見霜侵鬚雖無京兆白花漚還有太官青玉壺
武安曾孫我外弟聞君得人助君喜可能餅果饜兒童
不有杯盤到隣里去年南歸飲王家把盞猶見黃梅花
城南尋春成歲事忍不省顧隨泥沙世事何須還刺口
輕薄論交翻覆手自憐只似永州甞歸喜蛇存視吾正
柳子厚說永州甞為太醫採蛇者曰
視吾正而吾蛇尚存則弛然而臥

次韵崇美述志

仲子甘心織屨避萬鍾淵明不肯折腰為五斗一年鴻

雁識來往終日沐猴何去取甥詩意慕兩君閒讀書要
在存心久平生所談性命與長棄不憂金石朽我今頗
習鶯子定猶復晨朝怖頭走剗心先擬謝聲名不作羊
鄒悽峴首雲梯雨矢集無方我已心灰同墨守恐甥自
是禹門鱗未可潛逃入吾藪琢磨晚覺孟光賢畏我放
言時被肘甥能鋤我青門瓜正午時來休老手

湯村逢陳安性

東裝清曉來江浦瘦馬羸童犯山雨解鞍入寺聞鐘聲

堂上僧齋日初午故人聆我足音喜紗帽相逢坐東廡
別來幾日領生須相見驚疑更問語念昨與君俱讀書
貧賤不為人比數侍郎門館乏容悅舉子文章慙講誦
瞽言彊獻亦何有君去東州我之楚可憐今日江頭路
草草逢君具雞黍我貧無策未容飽君祿雖微不猶愈
如今未可計得失且作新詩致醇醕

過熊耳山

殺一不辜神所恫呂母何預於樊崇蜂螳無王求所止

一朝積甲齊熊耳兩峯相向猶眈眈千載定林餘一龕
我來捫石望荆杞此山閱人亦多矣

送公為之淮南

陶靖節云既耕亦已種
且還讀我書此其意也

負米萬里緣其親運甕無度憂其身讀書莫學流麥士
挾策勿比匹羊人乃翁辛苦到白髮今汝彊勉當青春
咎時管鮑以君霸此兩士賈寧非貧

即事呈閔中順之二年兄二首

蠖軒屈首詩書人自喻適志非求伸聞蟬熟寐白竹簟

見客一整烏紗巾
語言無味窮鬼志
香火有緣居士身
明年得去不汲汲
種竹待筍猶須春

吾兩同年俱可人
平生一為知己伸
何由利口似虎圈
應不拭吐煩龍巾
卜鄰只約二三子
看山擬分千百身
綠鬢哦詩欲成雪
朱顏得酒尚能春

順之將攜室行而苦雨用前韵戲之

十旬九雨龍淫荒
林蟬砌蟪俱悲涼
豐隆不閔行澤足
猶喚脂車煩阿香
我知此咎非風伯
憑憑幕天爾勅敵

王郎行李望秋晴莫汚北飛雙鳳翼

飲謝公輔家

皇天於春自著意安排未遣東皇家朝雨已教潤壓土
曉風更將寒約花詩篇驅使到老得酒船拍浮即生涯
四年逢春今日好可是芳物年年加

以蒼陵谷引水記呈毅父惠詩次韵

與君莫從栖霞東有泉鏘然發深谷人言祥符行幸城
無水跨野疏泉此山足後來修廢吳與李誰其記者江

休復我欲重銘章聖功借君巨筆鑿寒玉

春雪監中即事二首

愁雲欲雪紛來族微霰錚鏦先入竹舞空蛺蝶殊未下
迸瓦明珠正相逐僕夫無事困薪蘇烏鳥不鳴依室屋
肺病惡寒望勸酬桔梗作湯良可沃

白雲自非桃李族陽春且止聽黃竹江風吹葦暗天地
鷗鳥紛紛起追逐請看萬瓦變璫璣平日塵寰無此屋
閒居幽事亦堪論小徑苗生土增沃

晚春二首

春呼羣豔與偕藏
殘英風勸作清狂
消愁賢聖酬酢寡
破睡槍旗幽興長

春歸風雨一朝盡
畫靜園林諸趣嘉
蜻蜓出水羣掠蚋
鴨鵝衛巢雙趁鴉

示張仲原秀才二首

去年鉅野張狂瀾
黃河水不到魚山
焦城有屋仲子築
它日能來相往還

城頭急雨昏長川
城邊清流鷗鷺閒
城西雲黑電腳落
斜日正在城東山

村居即事

小麥青青大麥稀
蠶娘拾繭盈筐歸
放牛薄暮古堤角
三四黃鸝相趁飛

夏夜雨意

凝雲遮漢月不舒
微電時照東南隅
風條不動柱礎濕
初夜深砌吟螻蛄

蒲萄

蒲萄新條易扶疎
椿花鎖碎滿庭除
旱乾只喜雨破土
潦潤不憂河決渠

漫成呈文潛五首

無心看春只欲坐
偶騎馬傍春街行
可憐愁以草得暖
一寸心從何處生

花如怨人不近眼
深院一枝春得知
東風不是不愛惜
剛為花愁真是誰

十年閉戶不作舞為客一整紅羅裙莫倚琵琶解寫怨
朱簾坐下阿誰聞

平時無歡苦易醉自怪飲樂顏先酡乃知醉人不是酒
真是情多非酒多

不是生情薄桃李廣陵一株名最高俱飛蛺蝶莫猜忌
端為蜻蜓避伯勞

試院中秋

秋風吹空雁旁午長天無雲月呈露為須通曉照清樽

莫遣中宵生薄霧

直廬聯句

上閤井泉甘若醴蓬山點茶竹陰底未庾伏思容午課

休宮殿初涼朝雨洗補身閒出飲官不嗔日長睡足長

精神未未慙便作蠹魚老拔毛濟世知何人補之

雞肋集卷十四

欽定四庫全書薈要卷一萬五千二百八十二

集部

雞肋集卷十五

宋 晁補之 撰

律詩

五言

北山道中示公為

吾方賣劍日汝正抱孫歸
昭代無官守平生近釣磯
青山上野艇白水到林扉
曬棗日猶烈鳴枝風已威
荒陂民事少迂徑客行稀
傷雨蟬知默違霜雁見幾
卜居南

縣早收課北莊微行李收兒識生涯田叟譏丞嘗了歲
事養孱息塵機反舍從爭席行衢莫振衣潛逃多落莫
放浪少歔歔文字陪吾老功名許汝非

和關彥遠雪

春雨翻成雪朝鑪未覺炎拂檐驚乍響綴袖喜初霑庭
薄寧堪跡空繁詎可瞻正憐風共起終恨雨同漸疎箔
光來細重扉氣入嚴形容擣櫟隱意象岱嵩添孤潔憐
牆仞虛明快屋檐棲枯偶猜蝶穿隙暫疑蟾詩案間飄

楮粧帷誤洒區紫盈仙縷結瑣屑女針鉅履上長干足
頤間角里髯手龜良欠藥膚粟重遭爛池憶秦龍死河
懷漢馬潛三章滿嘗吊兩騎望能占有德羣污化無威
衆動恬堅凝我無必皎潔爾何嫌僵臥安非介甘餐武
亦廉妍辭犬子簡拙興客兒鹽搏作隋珠燦垂為紂箸
尖公車貧笑跣洹水夢憂殲斃鶴清宜繞衣狐窶莫兼
且當除諷渴未暇怯樵店戒婢當遲埽呼奴更出覘攬
來真可數消去豈堪拈便洗埋灰釜行操割畝鎌它時

玄尚白今歲突應黥漕府君黃綬儒宮我絳幘寒吟無
與律貧病不須砭玉飯流脂滑金羹割尾纖山陰子猷
興歸去為誰淹

試院次韵呈兵部葉員外端禮并呈祠部陳員外
元興太學博士黃冕仲

盛世天休沓真人實歷開太任當政闡元老位公槐莫
盛官人始相從試士來鳴珂咸俊彥索米獨塵埃未歎
官曹隔多慙賞鑑陪成川須臾澮崇厦要條枚文武中

銓集丹鉛百卷堆豚魚聊可辨皮弁不應恢

左選試經義右選試

兵策虎出爭亡天蛇成屢奪孟調鍾求雅濫烈火試珉瑰

綠暗驚庭葉朱明換律灰得臬夸艾捷聞鶴悼堅摧繭
緒談飛塵澠波酒挹蠱賁酬皆絕韵搜索病非才半是
仙槎客曾隨禹浪雷遭時魚奮角失路劍生苔膽氣衝
星在詞源卷漢回聲名改閭里軒冕映輿臺護草懷堂
北燈花粲婦腮涼風吹枕夢薄雨滯城隈號奏天官近
臚傳御史催康衢驥鳴躍歸擔僕謹哈華省深局鑰衡

門翳草萊尚懷休假遠別語重裴徊

吳淞道中二首

停舟傍河滸四顧盡荒原日落孤鳴冢天寒犬吠村
帆凌震澤搶雨入盤門悵望夫差事吳山閱楚魂

曉路雨蕭蕭江鄉葉正飄天寒雁聲急歲晚客程遙
鳥避征帆却魚驚盪槳跳孤舟宿何許霜月繫楓橋

濟州道中寄葉勛秀才

曉路入西郊新霜著鬢毛貧交借羸馬慈母授征袍
野

靜狐狸出天寒雁鵲高艱難憶親舊清淚漬平臯

原上

閉門遺日月原上感年華久旱無場藿重陽有野花蕭蕭幾家靜脈脈一歧賒向晚悠然去秋風馬尾斜

答劉季孫

高臺擷黃菊獨上憶同登灌木閒相揖寒鴉偶自朋酒憐旁舍熟賦喜故人能寂莫西風裏藍輿興可勝

病起答關景暉

臥病車馬絕初非遺世人
逍遙乍形散邂逅却情真
見護屏能力相扶竹亦神
閒來佐歡喜漉酒用陶巾

同魯直和普安院壁上蘇公詩

畏暑聊尋寺追涼故遶池
雨園鳩喚婦風徑燕將兒
散篆縈簾額留雲暗井眉
龍蛇動屋壁知有長公詩

次韵黃奉議序致仕作

魯直仲父求作

聞道家書至山中不厭寒
近臣多白髮此老獨黃冠
金少從供具身輕莫據鞍
勞心為功業持與世人看

次韵履常見貽

人皆愛陳子新雨尚能來但使門多客何嫌室自埃弓
旌無遠野城郭有遺才底日常侯舍傳聲四輩催

次韵鄧正字慎思秋日同文館九首

平生鄧夫子文墨晚相依臺閣佳聲在湖湘爽氣歸
慎思

潭人再入館詩誇東筍密髮歎耨苗稀勤苦千秋事川明水

孕璣

雄深張子句山水發天光黃鵠愁嚴道玄龜困呂梁愛

君豪穎脫嗟我病傖囊驥尾何當附西風萬里長

屬文潛

蔡侯南國秀經緯眈昭回文史蛙生甌風雲蟄起隈吾

君求助意之子為時來萬縷防秋費何如一士才

屬天啓

高堂置書几連幕與雲齊暑服猶便葛秋槃已釘梨官

醪聊足醉古錦不成題空對燈花喜重城隔夜閨

輟直讐書館聯裾校藝場騰驤來萬匹挺拔出千章直

釣何妨得餐風未必香搜才賴公等要助俗成康

憶臥蓬萊閣同聽午唱雞星辰望天北簪組隔城西幾

日宣魚鑰長驅響月題更憑催鄧子要剗玉如泥
風雲日夕改秋氣襲堂闥映葉無蜩響依叢有蝶歸官
壺催賜耐鄰杵急成衣留滯真何補尊鱸興又違

氣入中秋勁更傳午夜長青燈蛾舞急白月雁啼涼
羈旅生來慣淹留久却忘吟詩酬鄧子畢昂出東方
前世諸生選平居數路開鄉閭自相與巖穴亦時來射
雉空亡天為蛇更奪孟千金曾市骨聊用作龍媒

聞慎思說豪塘居

聞在豪塘飲松林日百回當年鹿何往異世鶴歸來未

許茅齋竝終期蠟屐陪丹留杉不死夜氣看星魁

慎思家臨

相豪塘晉陶淡隱此山常養一白鹿蓋
桑鶴仙去藏丹於杉今大十餘抱矣

陪發運右司叔父集金山次韻

報國身無用還山計欲成煙霞異塵世江海慰高情幸
繼阮咸集恐慙疎受聲清詩逢絕景未覺負平生

送趙正夫京東漕

朝持使者節騎出大明宮霜拂蓬壺外春生海岱東清

時憂國事白首問民風我亦何為者丹鉛點勘中

次韵八弟西園課經二首

未熟秋原靜高蟬尚遠音半荒愁雨菊獨秀畏風林老
覺田原好慵疎里巷尋心知阿連勝新向佛桑深
嬾曠期陶謝呼兒讀晉書葛巾傾泛漱蠟屐上欽軀回
向空門舊揩磨意地初未堪朝市隱且欲去衡廬

千秋嶺上

永日倦高躋盤回四望迷松根危抱石嶺路曲隨溪馬

腹飛雲薄山腰過雨低陰崖不可度誰此構長梯

蒲津繫橋次李蔡韵

激箭波濤上為梁木石雄鐵牛驚陝右流馬出關東潦
集連艘斷冰融一水通詢謀自誰可賢有贊皇公

次韵練定祥符聽法

彌天一滴水何處是曹溪若作聲來解還成瞪發迷白
雲遮刹遠翠竹向檐低是物元非物莊周末可齊

自畫山水寄无斲題其上

湘吳咎窮覽懷抱自難忘毫素開塵牖江山入草堂寄
君花縣裏虛我竹林傍何物酬斯贈清詩要一囊

贈別張堯詢

趣操幾前輩詞章近古風身名沈飲外生事放言中鵠
驚從龜吉船車送鬼窮支離不征戍高臥有奇功

寄題寶應无斃鳧島堂二首

賓戲令晁子名堂無乃迂何為仍負弩祇合便飛鳧彭
澤且市隱太丘猶世儒解嘲吾亦勸繫雁一相娛

弟才方濤發兄老更疎迂君自軒軒鶴吾今泛泛鳬何
方折腰具能作列仙儒釣是亾羊事清樽稍可娛

憶廬山示元黻弟

湖口西江外廬山已目前太虛藏不極彭蠡浸無邊五
老寧行地香鑪自供天芝田隔人世應有讀書僊

秋夜西崗聯句

城南遠人跡蟲響最先秋河漢橫疑近

補

星辰爛不收

露濃枝上月

未

風駛苑中籌下直身田野

補

相忘世馬

牛市聲城郭夜

未

遙色草茅幽寂莫容還往

補之

文章得

獻酬天依閭闔轉

未

斗直未央留清洛東輸海

補之

夷門

北拱州寒燈知苦織

未

濁酒識窮愁飽食容高議

補之

蒼

顏媿薄遊黑貂寒事早

未

青史素心道附驥容吾鈍黃

金試絡頭

補之

凝祥池上聯句

粉垣周十里

補之

丹碧煥神宮

未

樓閣晚多雨梧桐天早

風

補之

人來夕照外

未

鳥起白蘋中

補之

何用厭城郭滄洲

佳興同 未

雞肋集卷十五

謹案卷十三第一頁後四行自作新詞碧牡丹按
宋詩鈔詞作詩

卷十五第七頁前五行蠟屐上嶽嶇刊本嶽訛嶽
今改



總校官庶吉士

臣

張能照

校對官編修

臣

方煒

謄錄監生

臣

倪時慶

謄錄監生

臣

鄭遇亨

欽定四庫全書薈要

集部

雞肋集卷

十六至
二十

詳校官助教臣謝登雋



欽定四庫全書薈要卷一萬五千二百八十三

集部

雞肋集卷十六

宋晁補之撰

詩七言

廷賢求賦先春亭

築圃名亭盡可人東皋百卉故先春
丘原滿目皆安在桃李成蹊又一新
薤草煩君開蔣徑湫醪容我著陶巾
青門瓜好平生事欲遣朱轡便卜鄰

送會稽關彥遠罷官河北

君年長我二十五偶以氣同均
弟第三歲吹沙禹河曲
一身飛艇越雲門未緣狗監知
才思端向牛衣無涕痕
秋月圓時應待我慧林孤磬澹朝暉

已酉六月赴上饒之謫醇臣以詩送行次韵留別
小雅思深志不悲反騷未與咎人違
五車謾苦君何益
三徑都荒我未歸
要過香鑪雙履步却從彭蠡一帆飛
它年笑向張公子應帶烟霞滿客衣

對雪和王仲至

鸞鳳交橫逐雨華
玉城銀澗共縈斜
且看霧散千峰瘴
未覺雷驚萬谷芽
碧落高情元物外
金閨清夢自天涯
寧知夜半寒歌客
煙斷鄰牆四五家

春雨呈文潛

倦將烏帽障黃日
一雨新開春已融
忽驚宮瓦出新碧
更喜海棠舒小紅
愛酒鄰張不可奈
聽歌老謝無由同
春如行客祇欲去
若為挽取須壺空

魚溝懷家

生涯身事任東西藥笥書囊偶自賁
柳嫩桑柔鴉欲乳雪消冰動麥初齊
沙頭晚日檣竿直淮上春風雁鷺低
歸去未應芳物老桃花如錦遍松溪

次韵金鄉宰韓宗恕寺丞見贈三首

桑濤無意犯星躔好在琴尊且樂全
彭澤孤吟成小隱蘇門雙嘯劇登仙
平時主父言多困晚節揚雄學始傳
鮑叔可能知管子勞君相許寄忘年

蜀客高詞詭割鮮直吞雲夢氣仍全自憐單闕窮為賦

不向元和共得仙

求仁云若使漢廷重用賦子
虛應恨不同年故以是答

嘉論一

朝傾蓋合新詩半夜叩關傳西窗却話巴山事它日相逢憶此年

公子翩翩出世賢少時術業已成全閒中道義輕三事
醉裏文章敵八仙客舍寒鑪聊可擁縣樓昏鼓不須傳
河陽花發期相過即是新年換故年

出都呈十五叔父

凌兢瘦馬不堪驅塞眼紅塵暗九衢太學蘼鹽聊樂只
故園桃李且歸歟上書北闕三年困種豆南山一半蕪
忍志動心天相我莫慙關吏辱陳餘

贈歐陽成判官

一言子產識然明白首憐君獨抱經去馬來牛隨白日
落花飛絮得浮名曳裾五府非良計發憤三書亦漫成
便作歸休豈無食木蘭垂露菊含英

次韵蘇注承議天鉢元長老像前拈香

蕭然方丈病儀成，衰笠忘來一境清。
應作是觀寧有相，實無得度即非情。
日當居士行時午，月在生公講處明。
能識微言只夫子，可憐惟我最初程。

次韵王正甫馬陵感事

風雨關河浩蕩愁，騷人慄慄對清秋。
追君舊事何堪聽，投我新詩不易酬。
紙上安知百年後，酒中聊可一生浮。
言歸款段誰能約，正有疎頑馬少游。

送顏長道客滑道士

海山兜率事悠悠底處仍須著力修莫認箭邊曾有鹿
安知蓑外是無牛社樗共作支離病園絮同為汗漫游
亦見顏公為言此春風過盡不擡頭

別關景暉二首

鄴王臺上幾追陪臺上鴉鳴古甕摧每對燈前青玉笛
不辭花下白銀杯

皆彥遠家物

九重幽夢驪駒近百卉佳時

鸚鵡催更約歡呼須繼日從教河漢卷星迴

筆陳雲橫未易陪雁門端見壓城摧櫟中麋出君搏飯

地上蛇成我奪杯好在田園心事嬾罷休
簪組鬢毛催稽山為有知章否欲泛扁舟定却迴

送曹子方福建轉運判官二首

談經草檄鬢華生初擁閩山傳節行江入桐廬青欲斷
溪從劒浦碧來迎茶雖戶種租宜薄鹽不家煎價欲平
要使祈招歌德意君恩不為遠人輕

侏儒未用笑先生孟博聊堪攬轡行學有人民可嘗試
詩須山水與逢迎邊夷豈識朝廷治耕釣唯知吏政平

臺閣時清多俊彥
蕭生雅意未宜輕

飲拔理盛居中家次韵二首

騎鸞玉府盡仙真
短羽愁攀天漢濱
詩嬾便應推老手
飲豪獨未後諸賓
宮壺銀箭剛知夜
龍燭金華已報春
倒載微吟笑兒稚
時清寧是習池人

一倒南齋玉宇醇
絕勝不醉楚江濱
驪駒且莫催歸御
鳴鶴何妨屬坐賓
我尚少年新白髮
君須痛飲敵青春
未愁驅使無詩句
怕遣壺空花笑人

次韵校理盛居中上元

四見都城燈火春，看驅肥馬走朱輪。
天傳九奏虛羣籟，海踴三山跨萬鱗。
追賞謾逃深禁直，拜迎祇望屬車塵。
預知短髮非歡事，只有觥船未愧人。

次韵蘇中丞喜文潛病間

攜筇過子約朝朝，況是門無百步遙。
午臥檐曦茶可煮，夜談窗霰栗堪燒。
范魚何用驚生釜，鄭鹿應知夢覆蕉。
試作文殊問居士，從今一飯久如消。

鎖試呈同舍三首

官局悠悠共此行，來時庭菊未含英。
五更脫葉驚書几，一夜寒砧滿禁城。
詩似涼風來有思，酒如清露挹無聲。
何時驄馬催歸去，更有林端魄一生。

天街初月映天河，拜敕東華走馬過。
解榻暫如龜遇木，閉簾還似雉嬰羅。
倦依書冊工催睡，悶倚詩篇足當歌。
可待紛紛厭朱墨，晝閒唯有飲無何。

周行櫛比未應充，薦廟方求古鼎鐘。
經眼乍愁千紙積，

解頤聊喜一言逢
黃花庭檻時雖過
白酒鄰槽願可從
更促寄衣真似旅
曉堂初怯露寒濃

試院呈文潛用前韵

神交千古聖賢中
尚想銅山應洛鐘
傾蓋十年唯子舊
知音一世更誰逢
天如蟻磨駸駸旦
談似縲車疊疊從
鄰榻鄧侯邠不共
擁衾百首興方濃

慎思聞家弟无數捷解見貽用前韵

吾弟平生辛苦同
匹雛志舉百鈞鐘
自慙操瑟尚不斥

勸使力田終有逢青眼故人欣捷報白頭老母喜占從
書林儻預西城集醺子酣酣杏正濃

復用前韵寄題慎思豪塘居

玉泉飛落白霞峰散入山田畝十鐘鄧子結廬真世外
陶公脫屣更誰逢鶯啼春竹風烟近龍起秋堂雨雹從
誰使山人空蕙帳蓬萊金殿興方濃

呈曹子方

曹子金門等陸沉壯年裘馬四方心檄傳白羽從沙井

詩寫紅巾遍武林
兵甲胸中無敵國
絲桐世外有知音
相逢不飲何為者
祇作寒廳擁鼻吟

泗州王諫議明叟留飲

雲水東遊蚤歲懷
半生塵土却教回
兩行堤柳關心在
一點淮山入眼來
北省主人誇酒好
南風稚子喜帆開
揚州底事牽行色
端為瓊花芍藥催

招緡雲寺關彥遠教授曾彥和集平山堂次關韵
蜀岡勢與蜀山通
龍虎盤擎上紫空
小語還憂驚太一

高堂元自在天中少師楊柳無遺跡承旨歌謠有舊風
斜日蕪城易興感忘懷猶喜故人同

陪關彥遠會彥和集龍興寺詠隋時雙鴨脚次關

韻

風起雷塘陵上塵雨荒苔院兩株春樓臺有跡皆餘燼
草木無知尚見珍博士獨能名玉葉使君還許壽靈椿
宣城此物常充貢誰與連艘送萬困

閻醇老作點齋

淨名良久文殊歎此是如來不二門要識結瘡非是默
應知分別亦無言一絃會得拙生愧三復能令孔子尊
正復立談封萬戶時清何害口瀾翻

與曇秀師別坐二十年而後相會於金山作

詩筆多生習氣牽老來經唄亦隨緣何妨偶入東坡夢
未害閒依北固禪萬里波濤憑檻語一山風雨竝窗眠
未甘白首塵埃地更約相逢二十年

送曇秀師歸廬山夢齋

扁舟又過楚江東
廬阜霜晴翠埽空
四海五湖皆逆旅
千巖萬壑正秋風
會觀沙界無華處
何必茅齋是夢中
已悟三生舊知識
不因天竺寺相逢

戊子六月十三日曝書得史院賜筆感懷

時監修
丞相儀

公也

君王孝悌纂修意
丞相忠良典領宜
却恨身為周柱史
不令人識漢官儀
當年請郡新進笑
今日曝書陳迹迷
猶有院中宣賜筆
不妨林下醉題詩

雞肋集卷十六

欽定四庫全書薈要卷一萬五千二百八十四

集部

雞肋集卷十七

宋 晁補之 撰

律詩

七言

和二叔父少監入館見賜詩

梗枓要是晚方成雄朔遺風世共驚
屑去未驚容必去逃名還自得高名
歌行元白辭濤壯書畫鍾王筆勢精
桑馬輜車何足算不將稽古愧桓榮

次韵四叔父寄賀二叔父少監入館并見寄詩

琅邪太守魯儒英
典校還高劉更生
已似諸荀竝才子
復如羣竇占詩名
尚吟河水憐孤姪
應與鄉人痛伯兄
老鶴長鳴近天漢
可容叢灌和驪庚

送歐誠發

春風共載揚州路
屈指都疑夢夜闌
可是重來俱白髮
只堪歸去却黃冠
為郎我賴文書少
作邑君逢政令寬
自古江山勝塵土
莫輕故步愛邯鄲

守蒲次新安西先寄府教授之道弟

文章之子日翹翹恐不能如豈有超助我彤襜問民俗
煩君泮水採風謠預知薄宦妨同處且可清樽約屢招
十月驅車漢函谷冷雲高處望中條

新安漢所徙函谷也

再用前韵荅之道弟府教授

文辭便是升堂賈談辯寧非入幕超已謂囊中能出穎
邨知車下正哀謠但從袁盎無何飲莫笑馮公不見招
伴我河山訪陳迹明年紅紫滿陽條

澠池道中寄福昌令張景良通直

十年一夢間湖湘欲往從之道阻長可但知君愛彭澤
不應言我薄淮陽馬穿峭底流泉白鳥下關頭落照黃
愁作驛亭寒不寐懷人思古九迴腸

次韵毅父提刑將至蒲見寄

騎報山雲見旗腳吏趨原雪沒靴翁竭來定坐玄猶白
掇去還憂易又東他日江湖空白首只今關隴有清風
登瀛契分南遷夢十五年來事事同

次韵毅父户部兄游栖巖寺

恐是初禪第一天千秋龍象鎮危巔坐看玉井蓮飄葉
絕勝香鑪日照烟點點蟻封知晉甸紛紛雁背向秦川
要須浩蕩奇言稱付與南華舊老仙

廬山

丹碧沈沈虎豹閒松幢引度九重關人間未覺渾無路
天上還驚更有山瑤草紅泉供挹酌金風白露送躋攀
良游自歎平生誤便作歸來鬢已班

敘舊感懷呈提刑毅父并再和六首

兒童豪氣自堪驚未入鄉人月旦評叔向亦聞呼使上
子將一見便知名平生蘭省追高步老去秦川共此行
賴有蒲城桑落酒高樓條華慰人情補之初舉進士毅父為考官即首送
賦成庚子尚魂驚往事如風未暇評長樂鐘前偶相對
凌烟圖上等浮名登車豈是君無意襜被何妨我自行
更許心親遺貌敬老來尤見舊交情

二人射策幾人驚要與三蘇共入評先聖子孫多異稟

累朝圖牒有高名書傳科斗猶須定

安國

釣拂珊瑚未可

行

巢父

子墨文章豪氣在登臨懷古一含情

須彌納芥事堪驚千歲聊堪一日評世上相逢俱夢寐
古來何處是功名簿書聽我依稀了雲水陪君浩蕩行
便與此山同不朽不應惆悵復牽情

郎潛如我未宜驚戶部須推宰相評

曾丞相云戶部不可無孔郎中

他

日碧山思却走當年紫府已收名共知白髮生青鬢未
廢長歌續短行樽酒不空多坐客君家餘事足陶情

親見揚雄自不驚吾人要使後人評白圭未可輕三復
小草須防得二名太華聳天如劒立黃河蹙野似軍行
栖遲自憶衡門後可是登樓不稱情

用評字韵和荅府教授十二弟

君詩飄舉似鴻驚書入揚州子弟評聖世由來升俊造
少年已自得聲名六經正可三冬足萬里聊堪一日行
更約彌敦同姓樂能來觸詠暢幽情

次韵邠倅王正夫

函谷雞鳴滿面塵夫君泛愛尚為親清時有味俱吾黨
黃髮相看更幾人物理未驚翁喪馬世情應笑子知津
似聞絕塞風沙苦只約觥船莫負春

蝮軒孤坐寄曹南教授八弟

畏暑經旬不涉街蝮軒孤坐壁生苔出檐碧筍猶爭長
映戶丹榴故後開雙蝶風前愁夜去一蟬雨外送秋來
曹南瘦弟應相憶白首遷兄未放回

次韵袁疇耕道見貽

閱世紛紛共旅亭歸來眼為里人明老夫未歎嘗三已
吾子何憂取一名仁義夙心成自誤文章小道得高評
曲池遠市偏宜暑攜卷同來看月生

寄懷八弟三首

君好作官容我隱我專築室待君歸古來奇特俱安用
老去疎慵自不違五府交書何怪密雙林白社未嫌稀
先君門戶觀之子葵藿吾今遜益肥

平日鵠原左右手蟹

居衛反

叩前後未須論清秋淮上多

詩句白首籬邊近酒樽杜舅高情篤兄弟先君至性厚
閨門兩公與爾同師法相待歸來老此園

揚州全盛吾能說鴨脚瓊花五百年忽見山光好詩軸
却思淮浦舊漁船柴荆故俗真虛老松菊幽齋已重遷
便作扶藜望衡霍清秋隨分有風煙

感興

淵明褊志迷歸去叔夜支辭謬養生道有窮通千世運
命無天壽四時行我能為蝶斯同化子亦知魚乃至情

謂馬謂牛無不可楚肝越膽太分明

次韵留守王公喜春

午窗鑪火不應殘春許花期特地寬
塞鴈初驚池藻暎谷鶯猶怯井梧寒
未須園裏幽尋去且更樓前遠望看
四牡行春定何日亦聞鐘鼓滿城歡

游華嶽歸道中望仙掌

深巖踏遍尋歸路仙掌依然在碧虛
無限游人重駐馬豈惟狂客倒騎驢
挂圖天漢朝霞上落影秦關夕照餘

千古全生纔一士可憐登覽盡丘墟

希夷祠堂
在觀中

潼關道中

塵土長安古道深潼關依舊接桃林使君驄馬來何後
道士青牛去莫尋春半河山猶寂莫日長坑阪正崎嶇
平生冷笑元龍誤老覺求田負寸心

自蒲赴湖早行作

小隱幽情薄宦身五更騎馬壽安塵春如流水行隨客
曉與青山氣逼人報國丹心千載事對花霜鬢一番新

秦吳絕域從來恨我已能知莫問津

罷蒲乾濠道中寄府教授之道弟

衝寒到郡待花開
花未開時却遣回
敢意三年容我隱
只如千里訪君來
二嶠轂擊何為者
五老雲霾安在哉
更約剡詩猿虎谷
它年重過埽莓苔

次韵文潛尉福昌時壁間清暑亭詩

亭在水
竹中

梅福當年守此官
荆山誰見韞琅玕
人如脩竹三冬好
詩與清溪九夏寒
未信簪裳妨小隱
蚤時雷雨起深蟠

春風攬轡河陽縣痛飲狂歌憶舊年

赴蒲道中寄洛倅王定國

時定國董
役永安

莫嫌馬上過春風得句挑溪柳澗中王事勤君急星火
客程驅我正萍蓬竭來尚可輕千里歸去何妨共兩翁
學道如今有微力作官求了不求功

再寄定國

河南少尹古臞僊銷盡新緣窘舊緣草字更無千載聖
談言自有一家天遠游輕世唯何甚少貶求容否不然

選壯坐狂俱齟齬社樗元自可忘年

荅闕中順之

黃卷脩然遇古人千秋遺恨一朝伸
久乾文舉尊中酒
虛負淵明頭上巾
纓冠未暇念同室
閉眼自欲觀吾身
幸有元和文似錦
不妨白雪和陽春

雞肋集卷十七

欽定四庫全書薈要卷一萬五千二百八十五

集部

雞肋集卷十八

宋晁補之撰

律詩

七言

自蒲赴湖至板橋逢杜謀伯

二年兩度踏京塵猶喜常逢杜子春
文學老來從舊日金蘭同好更何人
身慙隨檄終難彊計欲歸耕未敢陳
正是桃花紅似血不應無酒但霑巾

和石明叔喜雪

解凍南風故未薰
六英先歲舞車塵
盡消日觀千巖雪
初破江梅一萼春
立召金閨通籍客
更呼花豔大堤人
使君日飲無功業
同樂何妨亦為民

次韵韓求仁南臺朝請晚過南湖見寄

浮花浪蕊信東西
何許尋芳去自遲
流景不須驚石火
寸田應已長瓊枝
想君清興聊堪發
遣我憂心久欲夷
便作崔丞日臨水
鳬行撻尾不須知

再用前韵和荅

當時同赴飲城西傾蓋論心已恨遲
湖海可無年少氣雪霜還有歲寒枝
功傳汗竹藏王府詩入文弢動島夷
不會書生安用此眼前睨固未曾知

用前韵荅李行正教授

見我淮南被召西重來學館尚棲遲
未容小隱通三徑聊可卑飛共一枝
飲罷玉山方突兀賦成筆陳已淫夷
霜荷葉歎青衫舊聞子修身自畏知

次韵和求仁不赴照碧堂會呈无愧之作

政成歡誦沸田萊留鑰雍容更上才
繚郭平湖從替好倚天朱檻為誰開
曳裾况是他年舊倒載何妨盡日陪
自有登高能賦客可容清坐詠南臺

南臺靜坐一
壚香見傳燈

求仁復示怨句次韵

聞說高情久沈寥
縈維誰與永今朝
五車猶累方書好
萬物先從辯說彫
已向李咸心獨醉
更緣順子意都消
清秋璧月涼如水
莫遣纖雲翳紫霄

元符戊寅與元歟弟卜居緡城東述情

四海一居何處卜北窗祇取見家山要無名利來心曲
便有園林出世間拙宦莫興三黜歎老歸未厭百年閒
先君餘慶期之子吾駕如今不可還

次韵信守李拒二首

誰榜鈴齋作画山晦明終日卷簾看賦成夜燭纔銷寸
衙退朝曦未半竿枉渚孤吟愁旅雁

以況薄宦

蘇門雙嘯駭

朱鷺

以況二公贈酬

平生五袴何須詠一借黃鍾變谷寒

愛山何必羨歸山，簿領忙時撥置看。
閭闔自應行發軔，珊瑚終未拂堦竿。
樽中屢許陪文舉，廡下猶堪寄伯鸞。
便作功成同范蠡，白鷗盟誓不教寒。

再和嘉父見貽

使君心賞在高山，櫟社寧煩匠石看。
能似鼠多愁渡谷，仕如鮪鈍笑緣竿。
見歸田錄威儀披霧窺文豹，音韻當衢聽玉鸞。
曾共廣陵花下醉，綈袍應歎一何寒。

次韵嘉父喜雪

六出先春兆物華故撩高韵發車斜散榆天上齊飛筴
布玉畦中盡吐芽梁苑俊遊風不極剡溪清泛月無涯
雄豪樂事幽人詠都屬江南太守家

次韵信倅練定夢雪中過王侍郎

夢覓毗耶看雨華玉城銀澗過縈斜乍疑霧廓千峯障
未覺雷驚萬谷芽碧落清談元物外

上貳卿

金閨高興共

天涯

上貳車

寒雞喚起新詩就誰憶袁安正卧家

次韵李拒靈山亭宴集寵戲之句

勝游誰繼竹林賢
峴首高情自邈然
寶刹千尋出天半
靈山三面落樽前
梅花摘得寧煩驛
桃葉呼來不用船
南楚何須說窮巷
且陪鈴閣聽鶡絃

古詩桃葉復桃
葉渡江不用楫

次韵李秬梅花

寒巖幽霧不曾開
殘雪猶封宿草荄
一夢故應先臘破
百花渾未覺春來
慙非上苑青房比
誤作唐昌碎月猜
常恨清溪照疎影
橫斜還許落金盃

次韵李秬祥符軒

雲端紅粉拊雕欄，謝守綸巾語笑間。
游客乍驚人外境，居僧初識面前山。
暫來猶足留公賞，借與真堪著我頑。
鈴閣多餘賓從少，誰教平鉗盜不曾閒。
補之自謂

次韵李拒重修宴亭

壁間雙記快沈冥，山畔譙門水畔亭。
相國名因稽古白，使君眼為好賢青。
廢堤不復風搖柳，新檻依然月滿汀。
羈旅從公厭游樂，欲圖佳致作幽屏。

次韵李拒新庵

無心何用說心灰庵在青蘿綠篠隈自可談間公事了
不妨閒處道書開更攜邀月清樽上只著登山小屐來
桃李他年應勿剪使君嘉譽在閨臺

次韵李秬新移牡丹二首

使君著意與深培為向吳宮好處來得地且從三月暝
明年應更十分開
溱傍芍藥羞香骨江裏芙蓉妬豔腮
雲雨鴻龍摠非比沈香亭北漫相猜

笑倚東風幾百般忽疑洛渚在江干玉容可得朝朝好

金盞須教一一乾
送目漢皋行已失
斷魂巫峽夢將殘
七閩溪畔防偷本
四照亭邊更著欄

次韵李拒約賞牡丹

天紅濃綠總教回
更待清明穀雨催
一朵故應偏晚出
百花渾似不曾開
常誇西洛青屏簇
久說南滁紫線堆
任是無情還有意
不知十里為誰來

次韵李拒雙頭牡丹

寒食春光欲盡頭
誰拋兩兩路傍毬
二喬新獲吳宮怯

雙隗初臨晉帳羞月底故應相伴語風前各是一般愁
使君腹有詩千首為爾情如篆印繆

次韵李拒賞花

天香國色競新奇初過清明未覺稀困舞尚迎風嫋嫋
醉粧猶弄日暉暉飄零洛下千金價慙愧江南百草菲
謝守多才最憐爾百篇能伴羽觴飛

次韵李拒酴醿

天紅瑣碎競春嬌後出何妨便奪標雲鶴嬉晴來萬隻

玉龍驚震上千條
蓐收是蕩風前仗
萼綠飄翩月下綃
曾向瓊林亭畔見
天涯相遇一魂銷

立春日呈通守資中通直

搖軒柳態未應還
正在憑高望遠間
一夜春風吹北渚
清晨佳氣滿南山
動頭樂事從今數
信手詩章莫放閒
但惜濰陽蔡公子
鶯花爛漫向京關

題文潛詩冊後

君詩容易不著意
忽似春風開百花
上苑離宮曾絕豔

野牆荒徑故幽葩
愜心芻豢非雜俎
墜世江河自一家
頭白昏昏醉眠處
憶君頻夜夢天涯

次韵杜天達見寄

冷屋寒舟兩處懷
一封歸信隔年開
愁容頻與河冰泮
佳思先隨岸柳來
射雉便甘忘我矢
畫蛇何怪奪君杯
端知雪裏清吟好
未減山陰興盡回

景修二十歲衰為鄉舉之首
晚乃尉青田無不遇
色其里人晁補之為賦五十六字以別且勉之

一尉三千五百里
咎人嘗已歎沈英
陸機文賦成童妙
梅福官資向老清
盡說江山多勝事
且臨風月慰高情
它年見我長安道
貨藥無心更避名

赴元老劉園之集呈十二朝請十五推官二叔父
兼呈元老老邦式諸公

故鄉等作異鄉愁
常笑吾生不自謀
百日狂風春草草
十年歸夢客悠悠
倦游情話陪諸父
老罷親鋤學故侯
得坎輳流兩皆可
名亭應不用三休

次韵常美甥晝眠

炎歊暫臥北窗涼更覺甘如飴稻粱宰我糞牆譏敢避
孝先經筭謔兼忘憂虞心謝知更雁安穩身如掛角羊
要識熙熙不爭競華胥別是一仙鄉

和王定國見寄

請說當年王武子淮南別棄謫仙人自從金馬還通籍
直恐瓊花便不春遺愛誰方府中步舊時獨埽壁間塵
平山送目思公子自許詩成覺有神

和歐陽宣德經野步

時入
汴流

遡風何敢祝淮神
青律飛灰氣自醇
顧我衰容唯殢酒
因君佳句始知春
山中桂子年年好
觀裏桃英日日新
延對彤廷須努力

時歐陽君
方就引對

詹生學問及昌辰

雞肋集卷十八